



S obzirom na to da je Arbitražni tribunal za spor oko međuentitetske linije razgraničenja u oblasti Brčko («Arbitražni tribunal») uspostavljen u skladu s Aneksom 2 Općeg okvirnog sporazuma za mir, kao i to da su se sve strane potpisnice Općeg okvirnog sporazuma za mir saglasile da će ishod arbitraže biti konačan i obavezujući za sve strane, te da će svako neprihvatanje arbitraže predstavljati kršenje samog Općeg okvirnog sporazuma za mir;

S obzirom na to da je Brčko distrikt Bosne i Hercegovine («Brčko distrikt») uspostavljen kao rezultat Konačne odluke Arbitražnog tribunala od marta 1999. godine, te da je dijelom definisan kao kondominijum oba entiteta ali s vlastitim multietničkim institucijama samouprave na koje su entiteti, smatralo se, trajno prenijeli nadležnosti upravljanja;

S obzirom na to da se u Konačnoj odluci eksplicitno navodi da je status Brčko distrikta u skladu sa Ustavom Bosne i Hercegovine i onim što se njime propisuje - da se Bosna i Hercegovina sastoji od dva, i ne više od dva, entiteta;

S obzirom na to da je Arbitražni tribunal također donio Prvu i Dopunsku odluku, kao i Aneks Konačne odluke, te Dopunu Konačne odluke, te da se zajedno s Konačnom odlukom, svim odlukama Arbitražnog tribunala definiše i uspostavlja Brčko distrikt;

S obzirom na to da Arbitražni tribunal i dalje postoji kako bi izmijenio Konačnu odluku shodno potrebi u slučaju njenog značajnog nepoštovanja od strane jednog ili drugog entiteta, on mora nastaviti da postoji sve dotle dok njegove odluke ne budu sprovedene i dok ne bude postojao domaći organ koji bi umjesto Tribunala rješavao sve sporove koje Brčko distrikt može imati s entitetima i/ili državom u vezi s ovlaštenjima i statusom Brčko distrikta;

Imajući u vidu da, iako je Brčko distrikt definisan Konačnom odlukom kao «institucija» Bosne i Hercegovine, njemu Ustavom nije garantovan direktan pristup Ustavnom sudu kako bi on služio kao domaći organ koji bi zamijenio Arbitražni tribunal;

Imajući nadalje u vidu da nijedan zvaničnik ili organ kojem je Ustavom garantovan direktan pristup Ustavnom sudu ne može biti primoran da pred tim sudom pokrene postupak u ime Brčko distrikta niti na bilo koji drugi način obavezan da zastupa interese Brčko distrikta mimo interesa onih institucija koje su takve osobe ili organi prema Ustavu u obavezi da podržavaju;

Imajući nadalje u vidu da čak i u takvim slučajevima u kojima je Ustavni sud razmatrao pitanja koja se odnose na Brčko distrikt on nije na odgovarajući način uzeo u obzir odluke Arbitražnog tribunala;

Uvjereni, stoga, da jedini način da Ustavni sud Bosne i Hercegovine služi kao zamjena za Arbitražni tribunal jeste putem dodataka na Ustav Bosne i Hercegovine - koji je također Aneks 4 Općeg okvirnog sporazuma za mir - koji eksplicitno uključuju i odluke Tribunala i mehanizam za direktan pristup Ustavnom sudu;

Svjesni da neophodni dodaci na Ustav mogu biti usvojeni jedino dvotrećinskom većinom Parlamentarne skupštine Bosne i Hercegovine i da sve stranke koje imaju predstavnike u Skupštini Brčko distrikta imaju predstavnike ili u Parlamentarnoj skupštini Bosne i Hercegovine ili su u poziciji da utiču na one koje su na taj način zastupljene;

U potpunosti posvećeni odlukama Arbitražnog tribunala i Brčko distriktu, što je potvrđeno našom svečanom zakletvom na Ustav, odluke Tribunala, Statut i zakone Brčko distrikta, koju smo položili slobodno, našom voljom i bez rezerve ili namjere da postupamo drugačije;

U potpunosti podržavajući nastojanja supervizora za Brčko usmjerena na okončanje nadležnosti Arbitražnog tribunala;

Uvažavajući činjenicu da je okončanje nadležnosti Arbitražnog tribunala *conditio sine qua non* za okončanje same supervizije;

Imajući u vidu mogućnosti koje supervizor ima, u skladu s Konačnom odlukom, da traži odgovarajuća rješenja od Arbitražnog tribunala, za šta ova Skupština daje svoju punu podršku, ukoliko ovo pitanje ne bude pravovremeno riješeno;

Na osnovu člana 22 (2) (d) Statuta Brčko distrikta BiH i člana 64 (4) Poslovnika Skupštine Brčko distrikta BiH, Skupština Brčko distrikta na svojoj 1. vanrednoj sjednici održanoj 12. februara 2009. godine, jednoglasno usvaja

REZOLUCIJU

KOJOM SE APELUJE NA PARLAMENTARNU SKUPŠTINU BOSNE I HERCEGOVINE DA HITNO USVOJI DOPUNE USTAVA KOJE SE ODOSE NA BRČKO DISTRIKT BOSNE I HERCEGOVINE I NA SVE RELEVANTNE DRŽAVNE I ENTITETSKE INSTITUCIJE I ZVANIČNIKE DA PODRŽE I OMOGUĆE NJENO USVAJANJE

Skupština Brčko distrikta smatra da Brčko distrikt mora da ima Ustavom garantovan mehanizam za direktan pristup Ustavnom sudu BiH u vezi sa svim sporovima koje može imati s entitetima i državom u pogledu njihovih obaveza u skladu s odlukama Arbitražnog tribunala i statusom i nadležnostima Distrikta.

U vezi s apelom koji je Vijeće za implementaciju mira na svom sastanku u novembru 2008. godine uputilo «političkim liderima i članovima Parlamentarne skupštine BiH da hitno preduzmu sve potrebne korake kako bi se uspostavio traženi mehanizam (direktnog pristupa Ustavnom sudu Bosne i Hercegovine) uz potrebnu dvotrećinsku većinu u Zastupničkom domu PS BiH koja se, kako se sugerše sporazumom od 8. novembra, može osigurati», Skupština Brčko distrikta BiH jednoglasno, bez obzira na stranačku pripadnost, poziva svoje kolege u Parlamentarnoj skupštini Bosne i Hercegovine da hitno usvoje ove dodatke na Ustav Bosne i Hercegovine, čime bi se Brčko distriktu Bosne i Hercegovine omogućio garantovani direktan pristup Ustavnom sudu i na taj način pomoglo stvaranju uslova za okončanje supervizije u Brčko distriktu Bosne i Hercegovine.

U tom pogledu, Skupština Brčko distrikta poziva sve relevantne državne i entitetske zvaničnike i institucije da podrže i omoguće usvajanje dodatka na Ustav Bosne i Hercegovine.

Svi članovi Skupštine Brčko distrikta, imajući u vidu zakletvu koju su položili kao zastupnici, ovim se obavezuju da će podržati i omogućiti usvajanje dodatka na Ustav, bez obzira na stranačku pripadnost ili funkciju koju obavljaju.

Broj: 01-02-4/09
Brčko, 12. februara 2009. godine

PREDSJEDNIK
SKUPŠTINE BRČKO DISTRIKTA BiH

Mirsad Đapo, dipl. pravnik

DOSTAVLJENO:

1. Gradonačelniku
2. Predsjedniku Skupštine
3. Potpredsjedniku Skupštine
4. OHR-u
5. Parlamentarnoj skupštini BiH
6. Sekretarijatu Vlade – Sektoru za opšte poslove
7. Kancelariji Brčko distrikta BiH pri Vijeću ministara BiH
8. Arhivi